

**Inissianik attartorneq pillugu Inatsisartut
peqquussutaata allanngortinneqarneranik Inatsisartut
peqquussutaat (Namminersornerullutik Oqartussat
kommunillu inissiaataasa attartortittakkat
piginneqatigiilluni pigisatulluunniit
inissiannngortinneqarnerannut atatillugu attartortut
pisinnaatitaaffi pillugit maleruagassat, kiisalu
attartornermut akigititaasup naatsorsorneqartarnera
pillugu maleruagassat allannguutaat)**

§ 1.

Inissianik attartorneq pillugu Inatsisartut peqqussutaanni nr. 5-imi 31. maj 2001-imi inatsisartut peqqussutaatigut nr. 18-ikkut 12. november 2001-ikkut allanngortinneqartumi makku allannguutigitinneqassapput:

1. § 4, imm. 1 ima oqaasertaqassaaq:

" Utaqqisut allattorsimaffiannit § 3-mi taaneqartumit salliutillugit taaneqartutut tulleriinnilerlugit innersuussutigineqassapput:

- 1) Namminersornerullutik Oqartussat kommunilluunniit nutarterinernut isaterinernulluunniit atatillugu inissaqartitsisarnissamik pisariaqartitsinerat naammassiniarlugu inissiat, takuuk § 48,
- 2) attartortunut inigisaminnik piginneqatigiilluni inissiatut pigisatulluunniit inissiatut tiguserusunngitsunut inissiat, takuuk § 7a,
- 3) inissiat siusinnerusukkut inissaqartitsinissamik qularnaveeqqusiisoqarsimanerata naammassineqarnissaanut innersuunneqartussat, takuuk § 39, imm. 3,
- 4) inissiat aapparisaq toqukkut qimagaasup sulisunut inissiamik suliffimmut aalajangersimasumut inniminnigaasumik qimatsineranut atatillugu innersuussutigineqartussat, takuuk § 43, imm. 2, aamma
- 5) inissiat aapparisaq toqukkut qimagaasup inissiamit innarluutilinnut inissiatut immikkut aaqqissugaallunilu tunniussaasimasumit nuunneranut atatillugu innersuussutigineqartussat, takuuk § 43, imm. 3."

2. § 7-ip kingorna una ilanngunneqassaaq:

"§ 7a. Namminersornerullutik Oqartussat kommunilluunniit inissiaataasa ilaanni attartortut attartortitsisumut piginneqatigiilluni pigisassatulluunniit inissiaminnik tigusiiniallutik allakkatigut

kissaateqarpata, attartortitsisup attartooq piginneqatigiilluni pigisassatulluunniit inissiaatitaarusunngitsoq, § 4, imm. 1, nr. 2 naapertorlugu inissiap taamaaqataanik neqeroorfigissavaa.

Imm. 2. Imm. 1 naapertorlugu inissiap taamaaqataanik neqeroorfiginnittussaataaneq taamaallaat atuuppoq, attartortup attartornermut isumaqatigiissut malissimappagu, aammalu attartortup inissiamik neqeroorfigineqarnissaminut piumasaqaatinik allanik naammassinnissimappat. Attartortitsisup pissutsit pingaaruteqanngitsut imaluunniit attartortumit isumannaarneqareersut tunngavilersuutigisinnaanngilai."

3. § 8 ima oqaasertaqassaaq:

"§ 8. Namminersornerullutik Oqartussat kommunillu inissiaataat attartortittakkat najugaqatigiiffinnut aningaasaqarnikkut namminersortunut agguataarneqassapput.

Imm. 2. Najugaqatigiiffinni ataasiakkaani najugaqartut §§ 9 aamma 10, imm. 3-mi maleruagassat naapertorlugit najugaqatigiiffiup ingerlanneqarneranut sunniuteqaqataasinnaatitaapput, tassa najugaqatigiiffimmi najugallit ataatsimiinneranni najugaqatigiiffimmi siulersuisussanik sunniuteqaqataasinnaajumallutik qinersisimappata.

Imm. 3. Najugaqatigiiffinnut immikkoortiterineq, najugaqatigiiffinni siulersuisussanik qinersisarneq aamma taakku sulinissaat pillugit maleruagassat Naalakkersuisunit aalajangersarneqassapput."

4. § 9 ima oqaasertaqassaaq:

"§ 9. Najugaqatigiiffinni tamani ingerlatsinermit missingersuutissatut attartortitsisoq siunnersuusiussaaq attartortitsisumit akuerineqavitsinnagu najugaqatigiiffimmi siulersuisunut saqqummiunneqartussamik, takuuk § 10, imm. 1 aamma 2.

Imm. 2. Najugaqatigiiffiup siulersuisui ingerlatsinermit missingersuutitut killiliussat iluanni makku pillugit aalajangiinnaapput:

- 1) aserfallatsaaliinerit nutarterinerillu suut attartortitsisup najugaqatigiiffimmi suliarisariaqarnerai,
- 2) najugaqatigiiffimmi init ataatsimoorussat ingerlanneqarnerat atorineqartarnerallu aamma
- 3) najugaqatigiiffimmi sunngiffimmi sammisassanik assigisaannillu pilersitsisarnerit.

Imm. 3. Najugaqatigiiffiup ukiumoortumik naatsorsuutai attartortitsisumit akuersissutigineqavitsinnagit kukkunersiorneqassapput najugaqatigiiffullu siulersuisunut akuersissutigisassan-ngorlugit saqqummiunneqassallutik.

Imm. 4. Namminersornerullutik Oqartussat kommunillu inissiaataasa attartortittakkat allaffissornikkut aqunneqarnissaat, ilaatigut allaffissornikkut aqutsinermit akileeqataassutit suunissaat kiisalu akileeqataassutitut sullissinernullu akiliutitut, aningaasaliissutit ingerlanneqarneritut, missingersuusiortnermut, naatsorsuineritut kukkunersuiinernullu agguataarneqarneri ilanngullugit."

5. § 10 ima oqaasertaqassaaq:

"§ 10. Namminersornerullutik Oqartussat kommunillu inissiaataanni attartortittakkani najugaqatigiiffimmi inissianut ineqarnermut akiliutit tamarmiusut sukkulluunniit imatut aalajangersarneqarsimassapput najugaqatigiiffik periarfissillugu aningaasaliissutigisimasanit iluanaarutissatut inissiamik piginnittumut aningaasartuuteqarsinnaanngorlugu, takuuk imm. 4, kiisalu isertitaminit aningaasartuutit ingerlatsinermit attuumassuteqartut, taamatuttaaq akileeqataassutissatut aalajangerneqarsimasut unerartitsinerillu, akilersinnaanngorlugit.

Imm. 2. Ukiumi tullermi najugaqatigiiffinnut ataasiakkaanut ingerlatsinermit missingersuutit attartortitsisumit suliarineqarsimasut akuersissutigineqarsimasullu tunngavigalugit ineqarnermut akiliutit ukiumoortumik aalajangersarneqartassapput. Piumasaqaatit imm. 1-mi taaneqartut naammassinissaannut pisariaqartumik attartornermut akiliutit qaffanneqarsinnaapput qaammatit

pingasut sioqqullugit attartortunut pineqartunut allakkatigut ilimasaarutigineratigut, ilimasaarutillu imarissavai qaffaanerup naatsorsorneqarneranik, qaffaanermut pissutaasumik aamma qaffaanerup annertussusianik qaammammut koruuninngorlugit taallugit paasissutissat.

Imm. 3. Najugaqatigiiffiup siulersuisui aalajangiisinnapput najugaqatigiiffimmi naammaginartumik pitsanngorsaaneermik nutarterinermillu suliaasat suliarineqassasut, peqatigitillugu najugaqatigiiffiup siulersuisuisa pisariaqartinneqartumik ineqarnermut akiliutit qaffanneqarnissaat akuerisinnaappagu. Najugaqatigiiffiup siulersuisuisa aalajangiinerat najugaqatigiiffiup ataatsimiinnerani akuersissutigineqassaaq.

Imm. 4. Illup sananeqarnermini akiata 1,5 %-ia inissiaatillip aningaasaliissutinit iluanaarutigisarpaa, tak. § 11.

Imm. 5. Aserfallatsaaliuinissanut pilersaarutaasunut teknikikkullu ikkussukkat nutaanngorsarnissaannut naapertuuttumik toqqortassat pillugit, attartornermut akiliutip naatsorsorneqarnera pillugu kiisalu attartornermut akiliutip iluarsinissaata ilimasaarutigineqarnissa pillugu Naalakkersuisut maleruagassiussapput."

6. § 11 ima oqaasertaqassaaq:

"§ 11. Illuutip sananeqarnermini akianut ilaapput sananeqarnerani aningaasartuutit tamarmik tassunga ilaallutik pilersaarusiornera, nakkutillineq sanaartorfissagissaanerlu. Illup sananeqarnerani akia kvadratmeterimut minnerpaamik 7.000 kr.-eqarpoq.

Imm. 2. Illumi nutartikkami sananeqarneranut akia nutarterinerup naammassinerani teknikikkut aningaasaqarnikkullu naliliineq tunuliaqutaralugu aalajangersarneqartassaaq, taamaattorli tak. imm. 1.

Imm. 3. Illuutini pisiani sananeqarneranni akiusoq kingusinnerusukkut allanngortiterisinnaanerit, nutarterisinnaanerit imaluunniit pitsanngorsaasinnaanerit tapiliullugit naatsorsorneqartassaaq, taamaattorli tak. imm. 1 aamma 2. Illuutini tunissutisiatut, kingornussinissamut uppersarsaat malillugu pigineqalersuni, pigisamik naammaginartumik akilersillugu tunniussinermi allamilluunniit aappartaarnermi akiliutitaqanngitsumik pigineqalersimasuni taamatuttaaq imm. 1 atuutissaaq.

Imm. 4. Imm. 1 naapertorlugu illuutip sananeqarneranut aningaasartuutit kvadratmeterimut 7.000 kr.-itut aalajangersarneqarsimappata, illuummilu tulliini taagorneqartut ilaannik ataatsimik arlalinnilluunniit amigaateqarpat illuummut sananeqarnerani akigitinneqartoq appartinneqassaaq amigaataasunut tamanut kvadratmeterimut 1.000 kr.-inik, tak. imm. 1:

- 1) Uffarfik/perusuersartarfik imermik errortortagaq.
- 2) Kiassaait qitiusumik kiassaateqarfimmit kiassarneqartut/kissarsuut/kiassaait innaallagissamoortut.
- 3) Innaallagiaq.
- 4) Imeq imermulluunniit tanki.
- 5) Gas innaallagiarluunniit iganermut atugassaaq.
- 6) Illup ussissaatai, tak. imm. 5.

Imm. 5. Naqqup, qilaap iikkallu ussissarneranni kiffutissaq 250 mm ataallugu issussusilik atorineqarsimappat nalinga appartinneqassaaq, takuuk imm. 4, nr. 6. Kiffutissat allat atorineqarsimappata kiffutissat ussissusiat kiffutissanut (mineraluld) naatsorsorneqassapput.

Imm. 6. Imm. 2 naapertorlugu teknikikkut aningaasatigullu qanoq naliliisoqassanersoq pillugu Naalakkersuisut malittarisassiussapput."

7. § 12 ima oqaasertaqassaaq:

"§ 12. Inissiaqarfinni inunnit namminernit pigineqartuni imaluunniit inissiani inunnit namminernit

pigineqartuni ikinnerpaamik arfinilinnik inissiertalinni, piginnittumit ataatsimit pigineqartuni, ataatsimullu kiassaartilinni, errorsisarfilinni, nalliuttorsiortarfilinni, najugaqartunut illutalinni allatulluunniit ataatsimoorussanik atortulersugaasuni, attartortut ineqartut sinniisissaannik qinersisinnaatitaapput apeqqutininik tamanik inissiaqarfup ingerlanneqarneranut pingaarutilinnik attartortitsisumut oqaloqateqarsinnaatitaasunik.

Imm. 2. Ineqartut sinniisaannik qinersisarneq taakkulu sulinerat pillugu maleruagassat Naalakkersuisunit aalajangersarneqassapput."

8. § 16 ima oqaasertaqassaaq:

"§ 16. §§ 10-15-imi maleruagassat isumaqatigiissuteqarnikkut attartortumut ajoqutaasumik sanioqqunneqarsinnaanngillat."

9. § 57, imm. 3 ima oqaasertaqassaaq:

"Imm. 3. Attartortup nammineerluni nuunnermini nalinginnaasumik iluarsaassinissani kissaatigippagu, iluarsaassineq suliarineqassaaq suliarinerani assassornermik ilinniagaqarsimasutut illersorneqarsinnaasumik pitsaassusilerlugu. Attartortup taamaatinneqarnera atorunnaarneraluunniit naapertorlugu inissiap qimanneqannginnerani inissiallu misissoriartorneqannginnerani suliaq naammassineqareersimassaaq, tak. § 59."

10. § 57, imm. 4, ima oqaasertaqassaaq:

"Imm. 4. Attartortup nuunnermi nammineerluni nalinginnaasumik iluarsaassisarneranut aamma attartortup tamatumunnga atatillugu aningaasartuutaasa akilerneqartarnerannut Naalakkersuisut maleruagassiussapput."

§ 2.

Peqqussut 1. juli 2002-mi atuutilerpoq. § 1, nr. 1 aamma nr. 3-8 1. januar 2002-miit atuutilerput.

Namminersornerullutik Oqartussat, ulloq 21. maj 2002.

Jonathan Motzfeldt

/

Jørgen Wæver Johansen

Namminersorlutik Oqartussat

Imaneq 4

3900 Nuuk

E-mail: nsninatsit@nanoq.gl

Linkit iluaqutaasussat

Kalaallit Nunaanni inatsisinut nalunaarutit

Namminersorlutik Oqartussat inatsisinut toqqorsiviat
Naalakkersuisut